

LE BULUÍ'INĚ' DIOS JUAN

Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'ínë' yugu' huen dxin queë' ca naca le run bayudxi ilácatë. Jesucristo gusöl-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínë' neda' ca naca lë ni.

² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zë' nágagaca nu na' ulaba xtídzë'ë Dios ni, en ilún ca rna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxë'ë queéli', en gunë' ga cö'ö dxi icja ládxí'do'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bë'ë.

⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'inë' rë'u, en

gudibë' rë'u, tu' bugüë' dul-la' nabága'ru' len xichönë' le bulaljë' lë'e yaga cruz, cate' gútië' uláz queëru'.

⁶ Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzxiba! ¡ila'lé'e Lë' yúgu'të bönachi, enca' nupa ni' gulún Lë' huë', en bëtigaca Lë'! ¡ila'bödxí yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulé'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxön riguí'i rizáca'lena' libí'ili', en tsözxön len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' rnnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo.

¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyön chi'ë ca ribödxí lúzuba' böa' bëdxi.

¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu',

ate' gusöl-la' le quéguequi gadxi cö' bönachi quia' nacuá' luyú Asia, nupa nacuá':

Lu yödzö Éfeso,
 lu yödzö Esmirna,
 lu yödzö Pérgamo,
 lu yödzö Tiatira,
 lu yödzö Sardis,
 lu yödzö Filadelfia,
 lu yödzö Laodicea."

¹² Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiquequini oro.

¹³ Ladaj gadxi le nuá'gaca guí' na' bilé'eda' tu Bönni' riné'ë ca tu bönni'. Nácuë' tu lari' tunna le ridxín xini'ë, en luchu'ë nasië' tu le néquini oro.

¹⁴ Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiøj lahuë' ca guí'.

¹⁵ Rëpi yösa bení' ni'ë ca guíë bronze dxílido', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön.

¹⁶ Lu në'ë ibëla zxóagacaba' gadxi bölj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'.

¹⁸ Naca' Nu nabán caz. Gútia', ate' na'a zóaticá'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca.

19 Buzúaj lu guichi lë na' chibilé'enu', en le raca na'a, enca' le ral-la' gaca tödi na'a.

20 Lë ni naca le nagachi' ca naca quégacaba' gadxi bölaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi bölaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

2

Didza' gusöl-lë'ë yödzö Éfeso

1 Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi bölaj bení' lu në'ë ibëla, en ridë' gatsaj láchui'lö gadxi le nuá'gaca guí' na' néquiguequini oro.

2 Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxí' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí yë'.

3 Ribözali' zxön ladxi', en chigud'i guzxáca'li' tu dá'ali' neda', pero biti' gucuidi' ládxi'li'.

4 Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö.

5 Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xi-lataj.

⁶ Na'a, zoa tu le rácalen libí'ili'. Biti' rilé'eli' dxi'a le tuné' bönni' nicolaíta, nupa na' ta'yéaj ládxi'gaca budó' guiöj budó' yaga, en tun le ruá' dö', læ na' læsca' biti' rilé'eda' dxi'a.

⁷ Nu riyöni ral-la' uzé nagui læ ni rnné' Dios Bö' Lá'ayi, ruí'ilené' yugu' cö' bönachi quia' neda', Cristo, didza', rnné': Nupa ila'deli' lu le raca yödzölió, guna' ga ilágugaca le ribía yaga da' gatsaj láchui'lö luyú lachi queé' Dios, le gun ga ila'cuá'tica'sö nabán."

Didza' gusöl-lé'ë yödzö Esmirna

⁸ Gunné' ca': "Lësca' caní, buzúaj lu guichi didza' ni isöl-lu'u queé' gubáz quia' zóalené' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoé' zí'alö, en náquié' ca' Nu röjsete, Bönni' na' gútié', en bubané' tsaz.

⁹ Caní rnnía': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácaté rilé'eli' yöl-la' tsahui' le naca idú. Nözda' ca' ca ta'nné queéli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá Satanás, tu' xihui'.

¹⁰ Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi guié. Caní si' bē' libí'ili', ate' quí'i sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queéli'.

¹¹ Nu riyöni ral-la' uzé nagui læ ni rnné' Dios Bö' Lá'ayi, ruí'ilené' didza' yugu' cö' bönachi quia' neda', Cristo, rnné': Nupa ila'deli' lu le raca yödzölió, biti' bi gun yöl-la' guti quéguequi, læ na' gaca le buropi luzuí quégaca nupa ila'cuá'tica'sö lu guí' gabila."

Didza' gusöl-lë'ë yödzo Pérgamo

¹² Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a.

¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'.

¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bédxido' gulútigaquië'-ba' lógaca budó' guiöj budó' yaga, en gulunë' le ruá' dö'.

¹⁵ Lësca' caní nacuá'len libí'ili' nupa ni' nazí' lu në'eguequi xibá quégaca bönachi nicolaíta, lë na' bití' rilé'eda' neda' dxi'a.

¹⁶ Que lë ni na', bulí'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guié tuchi'.

¹⁷ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntú nu nunbë' le, pero núpasö na' ila'zí'i le, ilúnbë'e la na'."

Didza' gusöl-lë'ë yödzö Tiatira

18 Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiøj lahuë' nácgaca ca guí', ate' ni'ë nácgaca ca guië bronze dxílido'.

19 Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxon ladxi' queëli'. Nözda' nácarö idú ca runli' yugu' lë ni ca benli' zí'alö.

20 Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizi' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guiøj budó' yaga.

21 Neda' bë'a-nu lataj ubí'i ládxi'nu, pero biti' ré'ëninu ucá'ananu le ruá' dö' na' runnu.

22 Que lë ni na' chú'una'-nu tu le gátinu ga na' quí'i sáca'nu lu xihué'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'.

23 Guna' ga ilátibi' zxí'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queëli' tsca naca le runli'.

24 Ia'zíca'li' zóali' yödzö Tiatira, núlöli' biti' nazí' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni' idú, pero le

nácate naca xtidza' Satanás, tu' xihui', rea' libí'ili':
Biti' usubága'a libí'ili' ia'tú le ral-la' gunli'.

²⁵ Na'a, lè na' chinazí' lu ná'ali', guli'gún chi'i ga
idxintè dza huöda'.

²⁶ Bönni' ni' ila'déli'nè' lu le raca yödzölió, en
ilunè' ca rë'ènda' neda' ga údxitè, neda' guna' ga
ila'nná bé'enè' bönachi idútè yödzölió.

²⁷ Ca na' budödè' Xuza' Dios yöl-la' unná bè'
lu na'a, neda' ca' guna' ga ila'nná bé'enè' yugu'
yödzö, ate' gata' lu ná'agaquiè' tu xiyaga guié, ate'
ulu'zxuzxjè' bönachi na' ca nu ruzxuzxaj zxiga'
yö'öna néquini yu.

²⁸ Gu'a ca' le naca ca böljaj hui sila quégaquiè'.

²⁹ Nu riyöni ral-la' uzè nagui lè ni rnnè' Dios
Bö' Lá'ayi, ru'ilenè' yugu' cö' bönachi quia' neda',
Cristo, didza'."

3

Didza' gusöl-lè'è yödzö Sardis

¹ Gunnè' ca': "Lësca' caní buzúaj lu guichi didza'
ni isöl-lu'u queè' gubáz quia' zóalenè' bönachi quia'
lu yödzö Sardis. Caní uzúaju' lu guichi: Ru'è
didza' Bönni' na' nacuá'len Lè' gadxi bö' na', ate'
zxóagacaba' gadxi böljaj bení' lu nè'è ibèla, rnnè':
Neda' nöz quézida' le ruá' dö' runli', en nözda' chi-
nati cázali' sal-la' téquiguequi bönachi zóali' nabanli'.

² Buli'subán ládxi'li'. Guli'gún tsutsu le nacuá'len
libí'ili', le chizóa ilátigaca, tu' réquibe'eda' le runli'
biti' naca idú tsahui' lahuè' Dios.

³ Guli'tsöjné na'a xibá na' biyönili' le guzxí' lu
ná'ali'. Guli'gún ca rnna xtídzè'è Dios, en buli'bí'i
ládxi'li'. Channö cabí usubán ládxi'li', guída' ga

zóali' tsárido'os ca na' ridxinë' tsárido'os gubán, en bití' inözili' bizxi dza na' guída' ga zóali'.

⁴ Nacuá'len bal-la bönachi libí'ili' lu yödzo Sardis, nupa bití' nácagaca xihui'. Ila'dalen nupa ni neda', nácugaca lari' chiguíchido'os le ruluí' nuhuóacagaca idú tsahui', en nácagaca lesaca' gaca caní quéguequi.

⁵ Nupa ila'deli' lu le raca yödzo lió ugácuá' l'éguequi lari' chiguíchido'os, en bití' usúlua' l'águequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'.

⁶ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzo Filadelfia

⁷ Gunnë' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë zxí'ini guíë queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le.

⁸ Bönni' ni rnnë': Neda' nöz quézida' le runlí'. Nözda' nápalí' láti'do'os yöl-la' huáca, pero runlí' ca rRNA xtídza'a, en bití' rutuí'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntu nu gaca usayaj le.

⁹ Bulí'yútsöca', ta'dé' bönni' ni' Satanás, tu' xihui', en ta'zí' yë'ë, ta'nnë' nácagaquië' bönachi judío

ta'yéaj ládxi'gaca Dios, pero biti' nácagaquië' caní, guna' ga ila'dxinë' loli', en ulu'zechu zxíbigaquië' xiní'ali'. Ní'irö iléquibe'enë' nadxí'ida' libí'ili'.

10 Tu' benli' ca rnna xtídza'a, en gulözali' zxön ladxi', gun chi'a libí'ili' dza na' ila'guí'ila'zaca' yúgu'të bönachi lu yödzölió ni, lë na' gaca para si' bë' léguequi.

11 ¡Si' guída'! Que lë ni na' guli'gún chi'i le nápali', para cabí gaca nu gun ga cabí sí'ili' lë na' ral-la' gunna' queéli'.

12 Núlöli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' Lá' cubi.

13 Nu riyöni ral-la' uzë nagui lë ni rnnë' Dios Bö' Lá'ayi, ruíilenë' yugu' cö' bönachi quia' neda', Cristo, didza'."

Didza' gusöl-lë'ë yödzö Laodicea

14 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios.

15 Caní rnnë': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxi'li'. Dxi'arö gaca la' gácali' ca nisa ziaga o ca nisa zögui'.

16 Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuébi nisa nati yula na'.

17 Libí'ili' rnnali' rilé'eli' yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö!

18 Que læ ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutuí'i. Ral-la' gá'uli' ca' quia' le gun ga ulu'huóáca guiöj loli' para gaca ilé'eli' le naca quia'.

19 Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que læ ni na', buli'bí'i ládxi'li', en guli'gún xichina' idú ládxi'li'.

20 Buli'yútsöca', neda' caz zuína' ga nu riyaza, en rulidza'. Channö núti'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'.

21 Núlöli' idéli'li' lu le raca yödzölió, neda' guna' ga cö'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxön ga na' rö'ë rinná bë'ë.

22 Nu riyöni, ral-la' uzë nagui læ ni rnnë' Dios Bö' Lá'ayi, ruíilenë' didza' yugu' cö' bönachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxí lúzuba' böa' bëdxi. Chi'i ni bulidza neda', gunná: “Gudá xitsá'alö ni, ate' neda' uluí'ida' li' le run bayudxi ilaca tödi ni.”

² La' ní'sö gúzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'.

³ Rëpi yösa bení' Nu na' rö'ö lataj na', ca na' rëpi yösa bení' guiöj jaspe, en guiöj cornalina, yugu' guiöj nazáca'da'. Idú gásibi'ilö lataj na' zoa biguita' le naca lachi ca naca guiöj esmeralda, le rëpida' yösa bení'.

⁴ Idú gásibi'ilö lataj na' nacué' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguíchido'os, en dxíagaca ícjagaquië' le néquiquequini oro.

⁵ Ta'rúaj yösa, en guziú' rinnë lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios.

⁶ Ca dödilö lahui lataj ni dë tu ca naca tu nísado' le rëpi yösa bení' ca guiöj jara.

Nacué' tapa nupa nabángaca cuiti lataj na', tsölá'a huéaj, ate' zían guiöj lógaca dxíagaca zaca' cúdzi'löguequi, en láhuilöguequi.

⁷ Tu nu nutsa' ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate'

nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'.

⁸ Idápatë nupa ni, nacuá' xopa xíligaca que queëguequi, ate' idá'alöguequi, en lé'elöguequi xíliguequi dxíada'gaca zían guiöj lóguequi. Rëla, en te ža biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

⁹ Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en tē Nu na': "Xclenu'." Bátati'tēs tun idapa na' caní,

¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'të le dë!

¡Ca rë'ëni quézinu' nacuá', en gula'sí lo nacuá'!

5

Tu guichi, en Bönni' náquië' Bö'cu' Zxíla'do'

¹ Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le.

² Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú.

⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le.

⁵ Ní'irö tuë' bönni' gula ni' gudxë' neda', gunné': "Biti' cödxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' uládu'ë le naguëla'gaca guichi ni, en usálajë' le."

⁶ Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxila' zoa nu bëti lëba' lahuë' Dios, nacuá' gadxi lúzuba', en gadxi guiöj loba', le tu'luí' ca nácgaca gadxi bö' na' dzágagaca Dios, nasöl-lë'ë léguequi idútë yödzölió.

⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'.

⁸ Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' ruluí'i yöl-la' rulidza Dios quégaca bönachi queë'.

⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quél'u guichi na',
 en uládu'u le naguéla'gaca le,
 tu' bē'u lataj yugu' bönni' gulútiē' Li',
 ate' len xichönu' böá'uu' bönachi para ilequi queē'

Dios,

nupa nácagaca bönachi izá'a nacuá' idútē yödzölió,
 bönachi tu'í yúgu'tē didza' yúbölö,
 en nabábagaca yúgu'tē yödzö,
 en yúgu'tē luyú nacuá' idútē yödzölió.

¹⁰ Benu' ga nácagaquiē' bönni' ta'nná bē'ē
 en ga nácagaquiē' bixúz queē' Dios queēru'.
 Benu' ga ta'nná bē'ē lu yu yödzölió.

¹¹ Ní'irö buyúa', en biyönda' chí'igaquiē' gubáz
 lá'ayi zían. Zían gáyu'ē, en gáyu'ē nacu'ē. Nacu'ē
 idú gásibi'ilö lataj lo na' tsözxön len nupa na'
 nabángaca, enca' yugu' bönni' gula na'.

¹² Tu'ē zidzaj didza' yúgu'tē', ta'nnē':
 ¡Bönni' na' náquiē' Bö'cu' Zxíla'do' gulútiē',
 náquiē' lesaca' gata' yöl-la' unná bē' lu nē'ē,
 en yöl-la' tsahui', en yöl-la' réajni'i, en yöl-la' huáca!
 ¡Náquiē' lesaca' gunru'-nē' bal, en tseaj ládxi'ru' Lē',
 en cú'uru'-nē' yöl-la' ba!

¹³ Ní'irö biyönda' tul-la yúgu'tē le benē' Dios
 yehua' yubá, en lu yu yödzölió, en zxánilö luyú, en
 lu nísado'. Tul-la yúgu'tē le nacuá' yugu' lataj na',
 ta'nná:

¡Yöl-la' ba Nu na' rö'ö lataj lo,
 enca' Bönni' na' náquiē' Bö'cu' Zxíla'do'!
 ¡Gúntica'siru'-nē' bal
 en cú'utica'siru'-nē' yöl-la' ba,
 ate' inná bē'tica'sē' Lē'!

¹⁴ Idápatē nupa na' nabángaca ta'nná: “¡Ca' gaca!”

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguéla'gaca guichi

¹ Ní'irö bilé'eda'-në' Bönni' náquië' Bö'cu' Zxíla'do', ate' buládu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chi'i ca guziú' rinnë, gunná: “¡Gudá uyú!”

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácaterö lo para idéli'në' lu gudil-la.

³ Cate' buládu'ë le buropi le naguela' guichi na', biyönda' nu buropi na' nabán, ate' gunná: “¡Gudá uyú!”

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzë'eguequi. Bulu'nödzejë' queë' tu guié tuchi' zxön.

⁵ Cate' buládu'ë le bunny le naguela' guichi na', biyönda' nu bunny na' nabán, ate' gunná: “¡Gudá uyú!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns.

⁶ Biyönda' ruí'i didza' tu chi'i gatsaj láchui'lö tapa na' nabángaca, ate' gunná: “Chopa guié zxoá' xtila len lazxaj que tu dza huen dxin tu' gaca gubín, en xopa guié zxoá' cebada len lazxaj que tu dza huen

dxin, pero biti' gunu' ga yadzaj le naca za, en biti' bi gunu' que xisi uva nal-la."

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: "¡Gudá uyú!"

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guíë tuchi', en len yöl-la' ridún, en len yugu' yödzöhué', en len yugu' böa' guixi' sínia' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazë bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'.

¹⁰ Gulu'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno'! ¿Bátaxi caz uchi'a usöröu' queëtu', en uzí'i lëbu' yugu' bönni' nacué' yödzölió tu' gulútië' netu'?"

¹¹ Bulu'nödzjë' quéguequi yugu' lari' chiguíchido'os ilácuë', en gulé' léguequi: "Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ili'."

¹² Cate' buládzu'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön.

¹³ Gula'guínnaj böljaj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'.

¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'tè guí'ado', enca' yúgu'tè gapa zoa luyú bidxi lu nísado'.

¹⁵ Ní'irö yugu' bönni' ta'nná bē'ē luyú, en yugu' bönni' lo, en yugu' bönni' ta'lé'enē' yöl-la' tsahui', en yugu' bönni' ta'nná bé'enē' bönni' rōjáquiē' gudil-la, en yugu' bönni' dē lu ná'agaquiē', en yúgu'tē nupa nadó'ogaca, en yúgu'tē nupa biti' nadó'ogaca bulu'cachi' lógaquiē' gapa naca zxañ bulóaj, en gapa naca lē'e guiōj lu guí'ado'.

¹⁶ Gulē' yugu' guí'ado' na', en yugu' lē'e guiōj na': "Guli'dubága' netu', en buli'cachi' netu', para cabí ilé'e Nu na' rō'ö lataj lo ni' netu', en para cabí ideli' yöl-la' rilé queē' Bönni' na' náquiē' Bö'cu' Zxíla'do' netu'.

¹⁷ Chibidxín dza ulu'í lahui yöl-la' rilé quegaquiē', ate' ¿nuzxi caz sequi' guá' ilén le?"

7

Tu gayuá' yu' tapa-un milē' bönni'

¹ Gudödi gulaca yugu' lē ni bilé'eda' tapa gubáz lá'ayi zuíguequinē' idapa la'a yödzölió. Tu'záguē'ē xinózgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga.

² Bilé'eda' ca' ia'túē' gubáz lá'ayi zē'ē rirúajē' ga rilén gubidza. Nu'ē tu le udē'ē nupa náca gaca queē' Dios ban le gaca bē' léguequi. Bē'ē zidzaj didza', en bulidzē' idapē' gubáz lá'ayi ni' nadödi

lu ná'agaquië' yöl-la' huáca unná bē' ilún dítjanē' luyú, en nísado'.

³ Gudxē' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bē' ra' xigágaquië' bönni' huen dxin queë' Dios queëru'."

⁴ Biyönda' tsca nácagaquië' bönni' da' légaquië' lē na' naca bē'. Nácagaquië' idú tu gayuá' yu' tapa-un milē' ladaj yúgu'tē cō' zxi'ini xi'sóë' Israel.

⁵ Yugu' bönni' na' da' légaquië' lē na' naca bē' nácagaquië':

Chinnu milē' di'a dza queë' Judá.

Chinnu milē' di'a dza queë' Rubén.

Chinnu milē' di'a dza queë' Gad.

⁶ Chinnu milē' di'a dza queë' Aser.

Chinnu milē' di'a dza queë' Neftalí.

Chinnu milē' di'a dza queë' Manasés.

⁷ Chinnu milē' di'a dza queë' Leví.

Chinnu milē' di'a dza queë' Isacar.

⁸ Chinnu milē' di'a dza queë' Zabulón.

Chinnu milē' di'a dza queë' José.

Chinnu milē' di'a dza queë' Benjamín.

Bönachi guizxi yu nácugaca lari' chiguíchido'os

⁹ Gudödi guca lē ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'tē yödzö tu'í didza' yúbölö idútē yödzölió. Zuíguequinē' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin.

¹⁰ Tu'ë zidzaj didza' yúgu'tē', ta'nnē':

¡Yöl-la' rusólá za' lu në'ë Dios queëru', rö'ë lataj lo ni,

en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dódilö lahui lataj lo na', en ta'yéaj ládxi'gaquië' Dios,

¹² ta'nnë':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxön, en yöl-la' réajni'!

¡Rëtu' Li': "Xclenu'", en runtu' Li' bal!

¡Napu' yöl-la' unná bë', en yöl-la' huáca!

¡Gácatica'sö caní quiu', Dios queëtu'!

¡Ca' gaca!

¹³ Ní'irö gunábinë' neda' tuë' bönni' gula na', gunnë': "¿Nupxi na' nácugaca lari' chiguíchido'os, en gapxi bönni' légaquië'?"

¹⁴ Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'guí' gula'záca'da'. Gula'guíbë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'.

¹⁵ Que lë ni na' nacu'ë ca dódilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chí'i légaquië' tu' zóaléntica'sö légaquië'.

¹⁶ Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá

¹⁷ tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj láhui'lö lataj lo na'. Ichë'ë légaquië' gapa ralaj nisa le

ru'í yöl-la' na'bán, ate' Dios uzxié' lógaquié' nisa ta'bödxé'."

8

Le igadxi le naguela' guichi

¹ Cate' buládu'ë le igadxi le naguela' guichi na', gurö'ö dxi yehua' yubá idú gatsaj hora.

² Ní'irö bilé'egacada'-në' gadxi gubáz lá'ayi na' zuíguequiné' lahué' Dios, ate' bulu'dödé' lu ná'agaquié' gadxi lúzuba' böa' bēdxi.

³ Ní'irö bidé' ia'túë' gubáz lá'ayi, nu'ë tu zxi'ga'do' néquini oro, en guzuínë' ra' bucugu yehua' yubá ni'. Gulú'udé'ë yalaj lu në'ë para ugutsé' le len yöl-la' rulidza Dios le gulún yúgu'të bönachi queë' Cristo, en uzégu'ë le lu bucugu na' néquini oro, le zoa lahui lo lataj lo na'.

⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios.

⁵ Ní'irö gubáz lá'ayi na' bulië' zxi'ga'do' na' len bo' yalaj dxía lu bucugu na', ate' gurú'uné' le luyú. Gunné guziú', ate' bö zidzaj biyön. Guyëpi yösa, en gudödi budó' zxu'.

Tu'cödxé' lúzuba' böa' bēdxi

⁶ Ní'irö igádxité' gubáz lá'ayi na' zöngaquié' gadxi lúzuba' böa' bēdxi na' gula'cu'ë sina' ulu'cödxé' léguequi.

⁷ Bucödxé' gubáz lá'ayi zí'alö lúzuba' böa' bēdxi, ate' gurö'ö guiöj bögui' yöla sunna, en gu' nutsí'i rön, ate' bulu'huöxaj luyú. Guyegui tu cö' tsa tu

tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

⁸ Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxon régui lu nísado', ate' ia'láti'do'os ca gatsaj tu gatsaj nísado' na' böáca rön.

⁹ Guti tu cö' tsa tu tsonna cö' le nabángaca dzö'ö lu nisa zxon na', ate' guca ditaj tu cö' tsa tu tsonna cö' le ta'dödi láhui'lö nisa na'.

¹⁰ Bucödxë' gubáz lá'ayi bunni lúzuba' böa' bëdxi, ate' böxaj tu böläj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú.

¹¹ Böläj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

¹² Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' böläj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zeni' böläj, en beo' ia'láti'do'os ca gatsaj tu gatsaj rëla.

¹³ Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ní cate' ulu'cödxë' ia'tsonné' gubáz lá'ayi na' lúzuba' böa' bëdxi!"

9

¹ Bucödxë' gubáz lá'ayi guyu' lúzuba' böa' bédxi, ate' bilé'eda' nu naca ca tu böljaj lúzxiba böxaj luyú, ate' bulu'nödzejë' nu na' xzí'ini guié que lataj chul-la.

² Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'.

³ Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' bönachi ca tunba' xöjnö' dzö'öba' luyú.

⁴ Gunná bé'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en caléga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquië'.

⁵ Biti' bë'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'.

⁶ Yugu' dza na' ilé'ënë' yugu' bönni' iluti cuíngaquië', pero biti' ila'zéqui'në'. Ilé'ëninë' ilátië', pero ucuíta cuini yöl-la' guti.

⁷ Nalá'gacaba' böchi'zu na' ca nácagacaba' böa' nácugacaba' le néquiguequini guié, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi.

⁸ Naca guitsa' ícjagacaba' ca naca guitsa' íjjanu nigula. Nácagaca láyi'gacaba' ca nácagaca láyi'ba' bédxi guixi'.

⁹ Nácugaca luchú'ugacaba' le néquini guié. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la.

10 Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'.

11 Zoa nu rinná be'e lé'gacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

12 Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

13 Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ru'í didza' gatsaj láchui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios.

14 Chi'i ni ru'ílen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

15 Ní'irö bulu'sedxë' tapa gubáz xihui' na', chinucözë' Dios léguequi para lá' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió.

16 Biyönda' tsca nácagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopa gayuá' mil milë'.

17 Bilé'egacada'-ba' böa' na' ca tu lu bixín, ate' nupa ta'bia lé'gacaba' nacu luchú'uguequi le naca guí'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre.

18 Yugu' lë na' ta'ruáj ruá'agacaba' bëtigaca tu cö' tsa tu tsonna cö' bönachi nacuá' luyú, lë na' nácagaca guí', en dzön, en lë na' ruzégui'da'.

19 Yugu' le tu'dí'iniba' böa' na' ta'ruáj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

20 Ia'zica'rö bönachi, nupa biti' gulati lu chopani tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guió'j budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca.

21 Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guíchido'

1 Ní'irö bilé'eda'-në' ia'tué' gubáz lá'ayi nál-la, bötjé' birúajé' yehua' yubá, nácuë' böaj lúzxiba, en zoa ca tu biguita' ícjalë'. Rëpi yösa bení' lahuë' ca run gubidza, ate' nácagaca ni'ë ca ya'zxön ta'yegui.

2 Zoa lu në'ë tu guíchido' nayalaj, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi.

3 Ní'irö bë'ë zidzaj didza', ate' biyön chi'ë ca riyön cate' ribödxí'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'.

4 Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza'

yehua' yubá, rë neda': "Bucáchi'sö didza' ni gulu'í gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxibalö,

⁶ ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bíti'rö tse!

⁷ Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' bulú'inë' yugu' huen dxin queë', bönni' ni' gulu'ë didza' uláz queë'."

⁸ Ní'irö chí'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxí' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

⁹ Guyija' ga na' zoë' gubáz lá'ayi na', en gunábida'-në' gunné' guíchido' na' quía'. Gubáz lá'ayi na' gudxë' neda', gunné': "¡Guzxí', gudagu! Lu ru'u gaca zxixi ca naca bidxína'do' queéba' buz, pero lë'u huóaca silá'."

¹⁰ Guzxí'a guíchido' na' zönë', en gudahua' le. Lu ru'a gaca zxixi ca naca bidxína'do' na', pero cate' budxi gudahua' le, böaca silá' lë'a.

¹¹ Ní'irö gudxë' neda': "Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacua' yúgu'të yödzö, en gapa tu'í zían didza' yúbölö, en lógaca zían bönni' unná bë'."

11

Chopë' bönni' tunë' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacué' ni' ta'yéaj ládxi'gaca Dios.

² Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzo lá'ayi na' idú ca chopa-un beo'."

³ Gudxë' ca' neda': "Isöl-la'a chopë' bönni' ilunë' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquië' lari' le naca bödzádzado'."

⁴ Chopë' bönni' ni tunë' ba nalí, nácugaquië' chopá yaga olivo na' nazúaj lu guichi lá'ayi ca naca quégaquië', en nácugaquië' ca' chopá le nuá'gaca guí' na' nacué' lahuë' Dios, Xani yödzölió.

⁵ Channö guë'ëni nu guá' dö' quégaquië', irúaj guí' ruá'agaquië' le usuniti nu na' ré'ëni guá' dö' quégaquië', en guti nu na', enca' nupa ta'dá'baga' légaquië'.

⁶ Chopë' ni dë lu ná'agaquië' ulu'záguë'ë xinöza nisa guiöj lúzxiba, para cabí galaj guiöj tsca dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huöáca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilé'ënnë'.

⁷ Cate' údxi ilunë' ba nalí, irúajba' böa' sínia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'.

⁸ Le gulaca cazë' ila'túlusö ca' la' nöza lu yödzo zxön, ga ni' gudë'ë ca' Xanru' lë'e yaga cruz, en ca rucúdzu'ru' didza', nazí'i le ca' Sodoma, enca' Egipto.

⁹ Idú ca tsonna dza yu' gatsaj bönachi yúgu'të yödzo, en yúgu'të bönachi izá'a, en bönachi tuí'i zían didza' yúbölo, en bönachi yúgu'të luyú, ila'lé'eni le gulaca cazë', en bití' iluí' lataj nu ucache' légaquië' yeru ba.

¹⁰ Ulu'dzëjade'e nupa nacua' yödzölió tu' gulatië', ate' lu yöl-la' rudzeja quéguequi ila'söl-la' le ulu'nödzaj quégaca luzë'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacua' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'.

¹² Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálo, ate' nupa na' gula'dá'baga' légaquië' bila'lé'e légaquië'.

¹³ La' ní'isö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzo na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunny le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió

nadödigaca lu në'ë Xanru' Dios,
 en lu në'ë Cristo.
 Lë' inná bē'tica'së'.

¹⁶ Ní'irö idapa uru'ë bönni' gula na' rö'ögaquië'
 gapa na' ta'nná bē'ë lahuë' Dios, bulu'tsaga
 lógaquië' lu yu, en ta'yéaj ládxi'gaquië' Dios.

¹⁷ Ta'nnë':
 ¡Xantu' Dios, napa cazu' yöl-la' huáca!
 ¡Guzóa cazu', en zoa cazu', en ral-la' guída cazu'!
 ¡Xclenu', tu' chibugunu' dxin yöl-la' huáca zxön
 quiu',
 en risí lo' rinná bē'u!

¹⁸ ¡Gula'lé bönachi yugu' yödzö
 pero chibidxín dza gunu' léguequi xíguia'!
 ¡Naca dza uchi'a usöröu' nupa chinátigaca!
 ¡Ubi'u quégaquië' huen dxin quiu',
 yugu' bönni' gulu'ë didza' uláz quiu',
 nupa néquiguequi quez quiu', en gulún bal Lo',
 nupa náca gaca cá'asö, en nupa náca gaca lo!
 ¡Chibidxín dza usunítu' nupa bulu'suniti yödzölió!

¹⁹ Ní'irö gualaj yudo' queë' Dios rö'ö yehua'
 yubá, ate' bilá' lahui guí'ina lá'ayi ga yu'u didza'
 rucá'ana tsahui' le nunë' Dios. Guyëpi yösa, en
 gulú'u bö zidzaj, en gunné guziú' luyú. Gudödi
 budó' xzu', en gurö'ö guiöj bögui' yöla sunna.

12

Tunu nigula, en tuba' bëla zxön xitsiní'

¹ Ní'irö bilá' lahui yehua' yubá tu le naca bē'da',
 bulu'i lonu tu nigula náccunu le naca ca gubidza, en
 zoa zcan ní'anu beo'. Dxía ícjanu tu le néquini oro
 ga dxíagacaba' chinnu bölj bení'.

2 Nigula ni chizóa soa bí'ido' queënu, en ribódxinu tu' rúdia' lë'ënu. Riguí' rizáca'nu ruzóanu bí'ido' queënu.

3 Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'.

4 Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légacaba' luyú. Guzuíba' bëla zxön xitsiní' na' lonu nigula na' chizóa sóabi bí'ido' queënu. Zóaba' sina' gáguba'-bí' bí'ido' queënu na' ca gáljabi' na'.

5 Buzóanu-bí' tubi' bí'i bönni'do' ral-la' inná bé'ebi' yúgu'të yödzö len tu xiyaga guíë. La' bucuítatë'ë-bí' Dios bí'ido' queënu na', en buchisë'-bí' ga ni' zoa cazë' Lë', rö'ë lataj lo ga na' rinná bë'ë.

6 Buzxúnnajnu nigula na', zéajnu lu lataj cá'asö, ga ni' chinupë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalaj dza.

7 Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca lëba'

8 pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá.

9 Caní guca, gula' rú'unë'-ba' bëla zxön xitsiní' na' ní'ilö. Nácaba' bëla na' zóaba' dza ni'te, lëba' tu' xihui'. Gula' rú'unë' tu' xihui' yödzölió, dzágagaca le gubáz xihui' na' dá'gaca le.

10 Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca

queë', en le rinná bē'ë, enca' le rinná bē'ë Cristo, tu' chigula' rú'unē' ní'ilö nu na' buzegui yugu' böchi' luzá'aru' didza'. Rëla, en tē dza buzegui légaquiē' didza' lahuē' Dios queëru'.

11 Yugu' böchi' luzá'aru' ni bulu'cul-lē' nu na', tu' bulu'gunē' dxin xichönē' Bönni' na' náquiē' Bö'cu' Zxíla'do' queë' Dios, en tu' bulu'gunē' dxin didza' na' gulunē' ba nalí queë'. Biti' gulu'í ládxi'gaquiē' yöl-la' na'bán quegaquiē', pero gulátiē'.

12 Que lē ni na' gaca yöl-la' rudzeja yehua' yubá. ¡Buli'dzeja libí'ili', zóali' ní! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dē lataj que."

13 Cate' gúquibe'eba' bëla zxön xitsiní' na' chigula' rú'unē'-ba' luyú, ní'irö yöjsóa régu'ba'-nu nigula na' buzóanu bi'í bönni'do' na' queënu.

14 Ní'irö Dios bē'ë-nu nigula na' chopa xíliba' bisíá' náca gaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahuē'-nu idú tsonna iz yu' gatsaj.

15 Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'tē nigula na'.

16 Ní'irö luyú gúcalen nigula na'. Guyalaj luyú na', en gú'í nisa yegu na' gúbaba' bëla zxön xitsiní' na'.

17 Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu dí'a dza queënu, nupa na' tun ca rnna le gunná bē'ë Dios, en nazí' lu nē'eguequi le nunē' Jesucristo ba nalí.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a.

² Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budódiba' lu ná'aba' böa' sínia' ni yöl-la' huáca queéba', enca' xilátjaba' ga rinná b'é'ëba', en yöl-la' unná b'é' zxön queéba'.

³ Dxía hué' tu ícjaba' böa' sínia' na', le naca le guti lëba', pero buniti hué' na', ate' bulu'bani yúgu'të bönachi yödzölió, en yöjdá'gaca böa' sínia' na'.

⁴ Gula'yéaj ládxi'gaquië'-ba' bëla zxön xitsiní' na', tu' budódiba' yöl-la' unná b'é' queéba' lu ná'aba' böa' sínia' na'. Gula'yéaj ládxi'gaquië'-ba' böa' sínia' na', en gula'nné': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

⁵ Guta' lu ná'aba' böa' sínia' na' b'é'ëba' didza' ba zxön, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná b'é'.

⁶ Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacuá' yehua' yubá.

⁷ Guta' lu ná'aba' gudíl-lalenba' nupa néquiquequi quez queë' Dios, en bucúl-laba' légaquië'. Guta' ca' lu ná'aba' gunná bé'ëba' yúgu'të bönachi izá'a, bönachi yúgu'të yödzö, en bönachi tuí'i yúgu'të didza' yúbölö, en bönachi idútë yödzölió.

8 Yúgu'të bönachi nacuá' yödzölió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

9 Channö nu riyöni, ral-la' uzé nagui.

10 Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxön ladxí' nupa néquiguequi queë' Dios, en ta'yéajlë' Lë'.

11 Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxön xitsiní' na'.

12 Dë lu ná'aba' böa' sínia' ni yúgu'të yöl-la' unná' bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacuá' yödzölió böa' sínia' zí'alö na', böa' na' buniti huë' le guti lëba'.

13 Böa' buropi na' runba' ca' le nácagaca bë' ga ridxintë runba' ga ruhuóxaj guí' le za' lúzxiba, en ruhuóxaj luyú lógaca yúgu'të bönachi.

14 Rizí' yé'eba' bönachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná' bé'eba' bönachi nacuá' yödzölió ilunë' tu budó' ca nácaba' böa' sínia' na' gúcaba' huë' que guié tuchi', ate' nabanba'.

15 Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en güí'i didza' budó' ni, en gun ga nu guti yúgu'të nupa bití' ila'yéaj ládxi'gaca le.

16 Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'.

17 Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'.

18 Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

1 Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'.

2 Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que.

3 Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzölió.

4 Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gáti'tës ga sa'yéajë'. Cristo caz böá'uë' légaquië' ládjagaca bönachi, ate' nácagaca nupa bulu'dödi cuíngaquië' zí'alö queë' Dios, enca' queë' Bönni' na' náquië' Bö'cu' Zxíla'do'.

5 Catu caz gula'zí' yë'ë, ate' cuntu nu gaca bi innë quégaquië' ga na' nacu'ë ca dödilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

6 Ní'irö bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacuá' yödzölió, bönachi idútë luyú, yúgu'të bönachi izá'a, en bönachi tuí'i yúgu'të didza' izá'a, en bönachi yúgu'të yödzö.

7 Ru'ë zidzaj didza', rnnë': "¡Gulí'gádxi Dios, en guli'cu'ë yöl-la' ba tu' chizóa uchi'a usöröë' bönachi! ¡Guli'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

8 Ia'tué' gubáz lá'ayi söjnáhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na'! Caní guca que, tu' gulún nupa nacuá' ni' ga gula'zí' lu ná'agaquië' bönni' yúgu'të yödzö ilunë' ca nácagaca le ta'zë ládxi'gaquië' le ruá' dö'."

9 Ia'tué' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na', enca' budó' queëba', en gü'i lataj ta' ra' xigué o lu në'e le naca bë' da' lëba',

10 gunë' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'!

11 Cuéntica'sò dzön que guí' ga ni' qui'i saca' nu na'. Rëla, en te dza qui'i saca', ate' catu caz gata' lataj ulu'zì' ládxi'gaca nupa ila'yéaj ládxi'gaca-ba' böa' sínia' na', en budó' queëba'. Biti' ulu'zì' ládxi'gaca nupa ilu'í' lataj ta' laba' léguequi.

12 Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ralla' ila'böza zxon ladxi'."

13 Ní'irö biyönda' chi'i nu ru'í' didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zì' ládxi'gaquië' lu dxin gulunë', en ulu'zi'ë xibé ca sa'yéaj le gulunë'!"

Tu'zi'ë le rulá' luyú

14 Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë.

15 Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu zxoa' xtila, tu' chibidxín dza nu uzì' le! ¡Chinabídx do que le dë yödzo'lió!"

16 Ní'irö Nu na' rö'ö lu böaj na' bugún dxin guíë tuchi' idútë yödzo'lió, ate' buzi'ë le rulá' luyú.

17 Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'.

18 Birúajë' ia'túë' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidzë' gubáz lá'ayi zí'alö na' nu'ë guié tuchi', gunné': "¡Bugún dxin guié tuchi' quiu', en butubi tu'xóa huéaj le ta'bía lubá uva rő'gaca yödzölió, tu' chiná le ta'bía lubá uva!"

19 Ní'irö gubáz lá'ayi ni bugunë' dxin guié tuchi' idútë yödzölió, en butubë' le ta'bía lubá uva rő'gaca luyú, ate' yöjchú'unë' le ta'bía lubá uva na' lu yeru zxön ga ízí xisi. Yugu' lë ni ruluí' ca gunë' Dios, gunë' xíguia' bönachi nacua' yödzölió.

20 Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ru'agacaba' böa', en gudödi rön na' idú tsca gaca sá'aru' idú chinnu dza.

15

Yugu' gubáz lá'ayi nuá'gaquië' gadxi yödzöhuë'

1 Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxi gunë' xíguia' bönachi yödzölió.

2 Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí'. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios queégaquië'.

3 Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':
 ¡Li', Xantu' Dios, zxöntëro nacu' Li'!
 ¡Zxöntëro naca yúgu'të le benu',
 le tun ga rubánitu'!

¡Li' rinná bé'enu' yugu' yödzö!
 ¡Idú dxí'ado', en idú tsahui' naca ca bi runu'!
 4 ¿Nuzxi caz cabí gadxi Li', Xantu'?
 ¿Nuzxi caz cabí cu'u Li' yöl-la' ba?
 ¡Tuzu' Li' nacu' lá'ayi!
 ¡Ila'dxín bönachi yúgu'të yödzö,
 en ila'yéaj ládxi'guequi Li'
 tu' ta'lé'e naca tsahui' yúgu'të le runu'!

5 Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'.

6 Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro.

7 Ní'irö tu nu nutsa' ladaj idapa nupa na' nabángaca, bë' que queë'gaquië' gadxi gubáz lá'ayi na' gadxi zxíga'do' néquiguequini oro, en yúdzugaca le ruluí'i yöl-la' rilé queë' Dios, Bönni' zoa cazë'.

8 Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

16

Yugu' zxíga'do' yúdzugaca le ruluí'i yöl-la' rilé queë' Dios

1 Ní'irö biyönda' chi'i nu ruí'i zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' ruluí'i yöl-la' rilé queë' Dios!"

² Guyijë' gubáz lá'ayi zí'alö, en yöjlaljë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queëba'.

³ Ní'irö guyijë' gubáz lá'ayi buropi, en yöjlaljë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

⁴ Guyijë' gubáz lá'ayi bunny, en yöjlaljë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóáca rön.

⁵ Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní quégaca bönachi

⁶ tu' bulu'laljë' rön quégaca nupa néquiquequi quez quiu', en quégaca nupa gulu'í didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca quégaquië'!"

⁷ Ní'irö biyönda' ru'í didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tshui' naca ca richugu' quégaca bönachi!"

⁸ Guyijë' gubáz lá'ayi budapi na', en yöjlaljë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí que.

⁹ Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnë' zí'i queë' Dios,

Bönni' dë lu në'ë inná bé'enë' yugu' lë ni tu'saca' zi bönachi.

¹⁰ Guyijë' gubáz lá'ayi guyu' na', en yöjlaljë' le yudzu zxíga'do' zönë' lu xilataj böa' sínia' ga na' rinná bé'ëba', ate' gurö'ö chul-la gapa rinná bé'ëba'. Ní'irö, tu' gula'guí'i gula'zaca' bönachi, guláguya'a lúdxí'guequi,

¹¹ pero bití' bulu'bí'i lúdxí'gaca para cabirö ilúngaca le ruá' dö' tunë'. Gula'nnë' zi'i queë' Dios zoë' yehua' yubá tu' ta'guí'i ta'zaca', en tu' dxíagaca yudzu' ya' a na'.

¹² Guyijë' gubáz lá'ayi buzxopi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bé', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu.

¹⁴ Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yöjaca bö' xihui' na' idú yödzölió, en yöjtúbigaca nupa ta'nná bé', para tsöjáquië' lu gudil-la na' gaca lu dza zxön queë' Dios, Bönni' napa cazë' yöl-la' unná bë'.

¹⁵ Caní rnnë' Dios: “¡Buli'yútsöca! Guída' tsáldo'os ca ridxinë' tu bönni' gubán. Bica' ba nu zoa ban ladxi', en run chí'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bönachi.”

16 Yugu' bö' xihui' na' bulu'tubi yugu' bönni' ta'nná bē'ē, ate' bulu'dubē' tu lataj nazí'i le lu didza' hebreo: Armagedón.

17 Guyijē' gubáz lá'ayi igadxí na', en yöjlaljē' le yudzu zxíga'do' na' zönē' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rna: "Chinaca."

18 Ní'irö guyēpi yösa, en gur'öda' bö, en gunnē guziú'. Gudödida' budó' zxu', le gudödida'rö ca gudödi tsanni ni nacuá' bönachi yödzölió.

19 Birúaj tsonna c'ö'ölö yödzö zxön na', ate' gula'guínnaj yödzö nacuá' yödzölió. Yöjnenē' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queē' benē' xíguia' nupa nacuá' ni'.

20 Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'.

21 Böxaj ca' guiöj bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiöj bögui' na' ca tu gayuá' guiē, ate' yúgu'tē bönachi gula'nnē xihui' queē' Dios tu' nözi guiöj bögui' na' tu' bulu'sáca'da' zi'i léguequi.

17

Dios richúguiē' queēnu nigula udá dzaga

¹ Ní'irö bidxinē' tuē' gubáz lá'ayi ga zoa', nababē' gadxi gubáz lá'ayi na' gula'zönē' gadxi zxíga'do' na' néquiquequini oro. Bē'lenē' neda' didza', gunnē': "Gudá ni, ate' uluí'ida' li' ca gunē' Dios, gunē'-nu xíguia' nigula udá dzaga na', rö'önu lu nísado' zían.

² Gula'cua'len lënu nupa ta'nná bë' luyú yödzülió, en gulún le ruá' dö', ate' gula'zudxi nupa nacuá' yödzülió ni, tu' gulunlen lënu le biti' naca dxi'a."

³ Dios Bö' Lá'ayi guzóalenë' neda', ate' gubáz lá'ayi na' guchë'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná gu'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nnë xihui' queë' Dios.

⁴ Nigula na' dxíanu lëba' nácunu lari' xiná chul-la, en lari' xiná gu'ido'os. Nazí'i biquitaj queënu le néquiquequini oro, en yugu' guiöj nazaca', en yugu' bugá. Lu ná'anu rö'ö tu zxi'ga'do' néquini oro, en yudzu le nácagaca xihui', en le ruá' dö' runnu.

⁵ Ra' xigánu dá'gaca ca lënu, le tu'lu'í tu le nagachi', en ta'nná caní: "Yödzü Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzülió."

⁶ Gúquibe'eda' nazúdxinu nigula na' tu' bennu ga gulaj rön quégaca nupa néquiquequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'.

⁷ Gudxë' gubáz lá'ayi na' neda', gunné': "¿Bizx que rubánu'?' Uzéajni'ida' li' lë na' nagachi', le rulu'í ca naca nigula ni, enca' le rulu'í ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'.

⁸ Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúajë' Dios dza ni'te quez cate'

si' gata' yödzülió. Cate' ila'lé'eni böa' sínia' na' guzóaba' zí'atélö, pero biti' zóaba' na'a, ulu'bani tu' nubanba'.

⁹ Lë' ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi guí'ado' gapa rö'önu nigula na'.

¹⁰ Lësca' caní gadxi ícjaba' na' tu'luí'i gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'tüë' biti' ridxíninë', pero cate' guídë', inná bë'ë tu chí'ido'osö.

¹¹ Böa' sínia' na' guzóaba', pero biti' zóaba' na'a, ruluí'i tu bönni' izxunu', inná bë'ë. Nunë' tsözxön bönni' gadxi na', ate' tödi ni nítië' tsaz.

¹² 'Chi lúzuba' na' bilé'enu' tu'luí'i chië' bönni' ila'nná bë'ë. Biti' ta'z'í'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxön len böa' sínia' na'.

¹³ Chië' bönni' ni, lébisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'.

¹⁴ Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

¹⁵ Gubáz lá'ayi na' gudxë' ca' neda', gunné': "Yugu' nísado' na' bilé'enu' gapa ni' rö'önu nigula udá dzaga na', tu'luí'i bönachi yugu' yödzü, en yugu' bönachi izá'a, en bönachi tuí'i yugu' didza' yúbölö, en bönachi yugu' luyú.

16 Chi lúzuba' böa' s'inia' na' bilé'enu', en tu'lu'í chié' bönni', bití' ila'lé'ené'-nu nigula udá dzaga na' dxi'a, ate' ulu'cá'ané'-nu cá'asö, en xiguídisö. Ilahué' xipéla'nu, en ulu'zégui'ë-nu len guí'.

17 Dios uchízié' icja ládxi'do'gaquié' chié' bönni' na' le gun ga iluné' ca rě'ëni quéziné' Lě', ate' ilácagaquié' tuz, en ulu'dödě' yöl-la' unná bē' quégaquié' lu ná'aba' böa' s'inia' na' para gaca ca rnna xtídzě'ë.

18 Nigula na' bilé'enu'-nu rulu'í yödzo zxön na' rinná be'e nupa ta'nná bē' yödzölió ni."

18

Riguinnaj yödzö Babilonia

1 Gudödi na' bilé'eda'-né' ia'tué' gubáz lá'ayi ruhuötjě' rirúajě' yehua' yubá, en dē lu nē'ë yöl-la' unná bē' zxön, ate' guyēpi yōsa bení' luyú ni'a que yöl-la' bení' queē' gubáz lá'ayi na'.

2 Bē'ë zidzaj didza' gubáz lá'ayi na', gunně':
¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

3 Caní guca que yödzö na' ni'a que le gulún bönachi nacua' ni'.

Guluné' ga gulún bönachi yúgu'tě yödzö ca nácagaca le ta'zēsö ladxi' le ruá' dö'.

Nupa ta'nná bē' luyú yödzölió gulunlen légaquié' le ruá' dö',

ate' guta' yöl-la' tsahui' quégaquié' bönni' to'o tuti' nacu'ë yödzölió

tu' guyánda' yugu' le nazaca' gula'zě ladxi' bönachi ni'.

⁴ Ní'irö biyönda' ruí'i didza' ia'tú nu zoa yehua' yubá, rnna:

Guli'ruáj lu yödzö na', libí'ili' néquili' quia' para cabí gunli' dul-la' tsözxön len légaquië', en para cabí quí'i sáca'li' le gaca quégaquië'.

⁵ Nayánda' dul-la' nabága'gaquië', en chinayasa nadxín caz lúzxiba, pero Dios röjnenë' le ruá' dö' núngaquië'.

⁶ Buli'bí'i quégaquië' ca na' gulunë' queéli'.

Buli'bí'i quégaquië' chopa cö' tsca le gulunë'.

Buli'bí'i quégaquië' chopa cö' tsca le naca xihui' gulunë' queéli'.

⁷ Guli'gún ga ila'guí'i ila'záquië', en ila'bödxi yéchë'ë tsca guca yöl-la' ba, en yöl-la' zxön guluí'i cúngaquië'.

Ta'zá' ládxi'gaquië', ta'nnë':

Rö'ötu' ni, rinná bě'ëtu'.

Biti' nácatu' uzëbi, en catu caz cödxí yéchi'tu'.

⁸ Que lë ni na', tu dzasö ila'dxín quégaquië' le ila'guí'i ila'záquië',

yöl-la' guti, en yöl-la' ribödxi yechi', en yöl-la' ridún.

Iléguië' lu guí', tu' napa cazë' yöl-la' huáca zxön

Xanru' Dios.

Lë cazë' usiúdxë' quégaquië'.

⁹ Ní'irö gunnë': "Ila'bödxi nupa ta'nná bë' luyú yödzölió, en gulún le ruá' dö' tsözxön len légaquië',

en bulu'zí' xibé le nequi quégaquië'. Ila'bödxë', en

ila'bödxi yéchë'ë cate' ila'lé'enë' dzön que yödzö zxön na' régui.

¹⁰ Zi'tu' zí'tu'sö ila'cu'ë tu' iládxinë' ca gaca xíguia' le gaca que yödzö na', ate' ila'nnë': ¡Bica' bayechi'

Babilonia, yödzo zxön ni, le gúcada' lo! ¡Tu dzasö guca xíguia' que!"

¹¹ Ní'irö gunné': "Ila'bödxë' ca' bönni' to'o tuti' nacu'ë yödzo'lió, en ila'bödxí yéché'ë ni'a que yödzo na' tu' cabirö soa nu ga'u bi ilúti'ë ni'."

¹² Cúnturö nu ga'u ni':

Le néquiguequini oro, en plata,
 en yugu' guiöj zaca', en yugu' bugá,
 en yugu' lari' nazáca'da', en lari' xiná chul-la,
 en lari' dxí'ado', en lari' xiná guí'ido'os,
 en yugu' yaga rilá' zxixi,
 en le néquiguequini dxita nazáca'da',
 en le néquiguequini yaga nazáca'da',
 en le néquiguequini guié cobre,
 en le néquiguequini guié,
 en le néquiguequini guiöj jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
 en le rilá' zxixi que mirra, en que yöj olíbano,
 en xisi uva nál-la, en le naca za,
 en yiözja dxí'ado', en xxa' xtila,
 en yugu' búrrodo', en yugu' bö'cu' zxila',
 en yugu' böa', en yugu' carreta,
 en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilé légaquié', ila'nná:

Nadúagaca le guzé ládxi'li'.
 Chigudödi quégaca yöl-la' tsahui',
 en le nácagaca lachi queéli',
 ate' bíti'rö idzö'lili' léguequi.

¹⁵ Ní'irö gunné': "Ila'bödxë' bönni' to'o tuti' na', tu' guta' quégaquié' yöl-la' tsahui' tu' gulúti'ë lu yödzo na', ate' ila'cu'ë zi'tu' zí'tu'sö tu' iládxinë'

ca gaca xíguia' le gaca que yödzö na', en ila'bödxi yéché'ë."

¹⁶ Ila'nné':

¡Bica' bayechi' yödzö ni guca zxön!

Guca ca tu nigula náccunu lari' nazáca'da',

en lari' xiná chul-la, en lari' xiná gu'ido'os,

en nazí'i biquitaj queënu le néquiguequini oro

en le néquiguequini guió'j zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacua' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zí'tu' zí'tu'sö."

¹⁸ Cate' ila'lé'ené' dzön que yödzö na' régui, ila'bödxë', en ila'nné': "¿Bízxilö yödzö guca zxön ca naca yödzö ni?"

¹⁹ Ní'irö gunné':

Ulu'dxië' bëchtö ícjagaquië'.

Ila'bödxë', en ila'bödxi yechë'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'

quégaca yúgu'të nupa náccagaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali' yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzö ni

ni'a que bi gulún queë'li' nupa nacua' lu yödzö ni.

21 Ní'irö tuë' gubáz lá'ayi nál-la buchisë' tu guiöj zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,
tu' iguúnnaj yödzö na' guca lo,
ate' bíti'rö nu udzöli le.

22 Bíti'rö nu yöni lu yödzö na' nupa ta' guínni lë'e le
rul-la,

en calëga nupa tu' cödxí gui
en calëga nupa tu' cödxí lúzuba' böa' bëdxi.
Bíti'rö udzöli bönni' huen dxin ni',
en bíti'rö yöni bö rigú'u le rutu ni'.

23 Bíti'rö uzení' nitú guí' lu yödzö na',
en bití' yöni chí'ë bönni' rutsaga në'ë ni',
en calëga chí'ibi' bí'i nigula rutsaga ná'abi'.
Caní gaca sal-la' nácali' lo, libí'ili' rá'uli', en rúti'li'
lu yödzö ni,

en guzxí' yé'eli' bönachi idútë yödzölió len yöl-la'
gudzá' queëli'.

24 Lu yödzö ni gulaj xichöngaqueië' bönni' gulu'ë
didza' uláz queë' Dios,

en xichöngaca nupa néquiguequi queë' Dios,
enca' xichöngaca yúgu'të bönachi yödzölió,
tu' bëtigaca nupa nacuá' yödzö ni léguequi.

19

1 Gudödi lë ni biyönda' tuí'i zidzaj didza' bönachi
zián nacuá' yehua' yubá, ta'nná:

¡Yöl-la' ba Dios! ¡Yöl-la' rusölá runë',
ate' yöl-la' zxön, en yöl-la' unná bë' napë' Dios
queëru'!

2 ¡Naca idútë li, en tsahui' ca rusiúdxë'!

¡Guchúguië' que yödzo na' naca ca tu nigula udá
dzaga,
en quégaca bönachi lu yödzo na' ila'niti tsaz!
¡Gulún ditaj bönachi yödzo'lió tu' nözi le ruá' dö'
gulunë'!

¡Dios buzi' lëbë' légaquië'
tu' gulútië' yugu' huen dxin queë'!

³ Leyúbölö gula'nnë': "¡Yöl-la' ba Dios!
¡Cuéntica'sö dzön ga régui yödzo na'!"

⁴ Idapa uru'ë bönni' gula ni' bulu'tsaga lógaquië'
lu yu tsözxön len idapa nupa ni' nabángaca, en
ta'yéaj ládxi'gaquië' Dios, Bönni' rö'ë lataj lo queë'.
Gula'nnë': "¡Ca' gaca! ¡Yöl-la' ba Dios!"

⁵ Ní'irö biyönda' ru'i didza' tu nu zoa lataj lo na',
rnna:

¡Guli'cu'ë Dios queëru' yöl-la' ba
yúgu'tëli' runli' xichinë', libí'ili' na' rádxi'li' Lë',
nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië'
Bö'cu' Zxíla'do'*

⁶ Biyönda' ca' nu ru'i zidzaj didza', le biyön ca
riyön cate' tu'i didza' bönachi zían, en biyön ca' ca
riyön ga ridödi tu yegu zxön, o ca riyön cate' rinnë
guziú', ate' rnna:

¡Yöl-la' ba Dios tu' risí lahuë' rinná bë'ë!

¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibë',

en cú'uru'-në' yöl-la' ba

tu' chibidxín dza laní que yöl-la' rutsaga na'
queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiquequi queë'!

¡Chinabá'a queëbi' bí'i utsaga ná'alénbi' Lë'!

¡Nácabi' le rulu'i nupa na' néquiquequi queë'!

⁸ ¡Dios ru'ë-bi' lataj gácubi' lari' nazáca'da'
le naca idú, en rëpi yösa bení'!

Lari' nazáca'da' na' ruluí'i le naca tsahui'
núngaca nupa néquiguequi queë' Dios.

⁹ Ní'irö gubáz lá'ayi na' gudxë' neda', gunné':
“Buzúaj lu guichi didza' ni: ¡Bica' bágaca nupa na'
nulidzë' Dios légaquië' para ila'cu'ë laní que yöl-la'
rutsaga na' queë' Bönni' náquië' Bö'cu' Zxíla'do'!”

Gudxë' ca' neda': “¡Yugu' didza' idútë li ni ru'ë
didza' Dios caz!”

¹⁰ Buzóa zxiba' xini'ë gubáz lá'ayi na' para tseaj
ládxa'a lë', pero gudxë' neda': “¡Biti' gunu' caní!
Neda' ca' naca' huen dxin queë' Dios ca' nacu' lí,
en ca' nácagaquië' böchi' luzó'o nazí' lu ná'agaquië'
le naca idútë li ca' naca queë' Jesús. ¡Guyéaj ládxe'ë
Dios!”

Nupa tuí'i didza' uláz queë' Dios, tuí'i didza' le
naca idútë li ca' naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' buluí'i
loba' tuba' böa' chiguichi, ate' lë' Bönni' dxíë'-ba',
Nu Run Ca Rnna, enca' Nu Rui'i Didza' Le Nácatë.
Caní'lë' tu' ruchi'a rusöröë' ca' naca le naca idútë li,
enca' caní tsejë' gudil-la.

¹² Rëpi yösa bení' guiöj lahuë', le nácagaca ca' guí',
en dxíagaca icjë' zían le néquiguequini oro. Nazúaj
lahuë' tu le lë', le cuntu nu nözi, pero tuzë' Lë'
nőzinë'.

¹³ Nácüë' tu lari' në'aj rön, en lë' ca' “Nu Naca
Xtídzë'ë Dios.”

¹⁴ Röjnógaquië' Lë' ni'a në'ë guizxi yu nacu'ë
yehua' yubá, dxíagaquië'-ba' böa' chiguichi, en

nácugaquië' lari' nazáca'da', le naca chiguíchido'os, en bití' naca bösaj.

15 Rirúaj ru'ë le naca ca tu guíë tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'.

16 Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

17 Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxön queë' Dios!

18 Gáguli' xipéla'gaca nupa ta'nná bë', en xipéla'gaca nupa ta'nná be'e bönni' röjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bia légacaba', en xipéla'gaca yúgu'të bönachi, nupa bití' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

19 Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu.

20 Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxí' yé'enë' nupa ni' guluí'i lataj nu uzúaj láhuiguequi lë na' naca bë' dá'gaca lëba', en gula'yéaj ladxí'gaca budó' queëba'. Böa'

sínia' na', enca' bönni' na' bë'ë didza' uláz queéba', gula'ru'unë' léguequi nabángacasö ca' ga rö'ö guí' zxön le réguilen lë na' ruzégui'da'.

²¹ Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzhiba, tu' guláguba' xipëla'guequi.

20

Chi gayuá' iz

¹ Gudödi lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' zxi'ini guíë que lataj chul-la, ate' nu'ë tu du guíë yödx.

² Guzxönë'-ba' bëla zxön xitsini' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en buca'anë'-ba' caní chi gayuá' iz.

³ Yöjchú'unë'-ba' lataj chul-la, en busayjë' lataj na', ate' budë'ë tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixë' yénguequi yugu' bönni' biti' nácagaquië' tsahui' tu' gulún ba nali queë' Jesús, en tu' gulún libán que xtídzë'ë Dios. Yugu' bönachi ni biti' gula'yéaj ládxi'gaca böa' sínia' na', en budó' queéba', en biti' guluí'i lataj nu uzúaj ra' xigáguequi, o lu në'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz,

⁵ pero ia'zica'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö.

⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bé'len Lë' chi gayuá' iz na'!

⁷ Cate' izá'a chi gayuá' iz na', ulu'sanë' Satanás ga na' nadzún.

⁸ Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsa nátagaca nupa ni, nátagaca ca naca yuzxi rö'ö tu ra' yegu zxön.

⁹ Guizxi yusö gula'dödë' idútë luyú, ate' gula'cu'ë lé'ajlö lataj ga na' nacuá' bönachi néquiguequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'.

¹⁰ Tu' xihui' na' nazí' ye'e légaquië', yöjchú'unagaquië' le ga rö'ö guí' zxön que lé na' ruzéguí'da', ga na' chizóaba' böa' sínia' na', enca' bönni' na' bé'ë didza' uláz queëba'. Ila'guí'i ila'zaca' ni' rëla, en te dza yúgu'të iz zá'gaca.

Ta'dxín bönachi lahuë' Dios ga rö'ë ruchi'a rusöröë'

¹¹ Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi.

¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en gualaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca.

¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca.

¹⁴ Ní'irö yöjtsázagaca yöl-la' guti, en lataj chul-la ga ni' rö'ö gui' zxon le naca lataj que yöl-la' guti le raca burópilö.

¹⁵ Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'.

² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queëbi' bi'i nigula chizóa utsaga ná'alenbi' tu bönni'.

³ Biyönda' ruí'i didza' nu rnna yehua' yubá: "¡Buli'yútsöca'! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi!

⁴ Dios uzxië' nisa ribödxí zoa guiój lóguequi. Cúnturö nu gati, en cúnturö nu cödxí, en cúnturö nu

cödxi yechi', en cünturö nu qui'i saca', tu' chigudödi quégaca læ na' gulaca zí'alö."

⁵ Ní'irö Nu na' rö'ö lataj lo ni' gunná: "¡Buyútsöca! ¡Yúgu'të ruúna' cubi!"

Gudxi ca' neda': "¡Buzúaj lu guichi læ ni, tu' naca idútë li didza' ni, en naca löza!"

⁶ Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga guí'aj nisa na' runna yöl-la' na'bán!"

⁷ Nupa ila'deli' lu le raca yödzölió, gaca quéguequi yúgu'të læ ni. Neda' gaca' Dios quéguequi, ate' léguequi ilácagaca zxí'ini caza',

⁸ pero nupa tadxi, en nupa biti' ta'yéajlë' neda', en nupa náacagaca xihui', en nupa tuti bönachi, en nupa tun le biti' naca tsahui', en nupa náacagaca udzá', en nupa ta'yéaj ládxi'gaca budó' guiöj budó' yaga, en yúgu'të nupa ta'zí' yë', chizóa riböza xilátjaguequi lu guí', ga ni' rö'ö guí' zxön que læ na' ruzéguí'da', læ na' naca yöl-la' guti le raca burópilö."

Yödzö Jerusalén le naca cubi

⁹ Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxíga'do' yúdxugaca gadxi yödzöhuë' yöjsétegaca, bidë' ga zoa'. Gudxë' neda': "¡Gudá ni! ¡Uluí'ida' li' bí'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

¹⁰ Guzóalenë' Dios Bö' Lá'ayi neda', ate' guchë'ë gubáz lá'ayi na' neda' tu lu guí'a sibi, en bu-luí'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios.

¹¹ Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu

guiõj nazáca'da' ca naca guiõj guí'do'os nazí'i le jaspe. Naca yõdzõ na' yení'ido' ca naca guiõj jara.

¹² Zoa tu zõ'õ zxõn, en sibi idú gásibi'ilõ yõdzõ na'. Lë'e zõ'õ na' nacuá' chinnu gapa nu riyaza. Ra' gapa nu riyaza na' nacu'ë chínnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cõ' di'a dza zxí'ini xi'sóë' Israel.

¹³ Lë'e zõ'õ le ruyú saca' ga rilén gubidza nacuá' tsonna gapa nu riyaza, en saca' ga za' bö' ziaga nacuá' tsonna gapa nu riyaza, en saca' tsólá'a ga ridõdi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza.

¹⁴ Zxan zõ'õ que yõdzõ na' nacuá' chinnu xilibi zõ'õ, ate' lé'egaca xilibi zõ'õ na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenë' neda' didza' zõnë' tu yaga urixi le néquini oro para urixë' tsca naca yõdzõ na', en tsca nácagaca gapa nu riyaza, en tsca naca zõ'õ que.

¹⁶ Yõdzõ na', lédi'i nácagaca idapa la'a. Lédi'i naca yõl-la' tunna que, en yõl-la' blaga' que. Len yaga na' burixë' tsca naca yõdzõ na', naca idú tsca gaca nu sa' idú chinnu dza, ate' lédi'i naca yõl-la' tunna que, en yõl-la' xitsá' que, en yõl-la' bölága' que.

¹⁷ Burixë' ca' yõl-la' yõdx que zõ'õ na', naca tu gayuá' yu' tapa-un dxita, tsca naca dxita que na' bönachí, lë na' ruríxinë' gubáz lá'ayi na'.

¹⁸ Zõ'õ na' néquini guiõj jaspe, ate' yõdzõ na' néquini órotëz, le naca yení'ido' ca naca guiõj jara.

¹⁹ Yugu' xilibi zõ'õ que yõdzõ na' nazí'gaca biq-uitaj guiõj nazáca'da'gaca.

Xilibi zö'ö zí'alö néquini guiõj jaspe.

Le buropi néquini guiõj zafiro.

Le bunni néquini guiõj ágata.

Le budapi néquini guiõj esmeralda.

²⁰ Le guyu' néquini guiõj ónice.

Le buzzopi néquini guiõj cornalina.

Le igadxi néquini guiõj crisólito.

Le izxunu' néquini guiõj berilo.

Le igá néquini guiõj topacio.

Le idxí néquini guiõj crisoprasa.

Le idxinéaj néquini guiõj jacinto.

Le idxinnu néquini guiõj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nōza lo que yōdzō na' néquini órotēz, le naca yení'ido' ca naca guiõj jara.

²² Biti' bilé'eda' tu yudo' lu yōdzō na', tu' náquiē' Xanru' Dios yudo' que, napa cazē' idútē yōl-la' unná bē', en lēasca' caní náquiē' Bōnni' náquiē' Bō'cu' Zxíla'do', náquiē' yudo' que yōdzō na'.

²³ Biti' run bayudxi tsení'gaca gubidza, en beo' lu yōdzō na', tu' uzení' yōl-la' bení' queē' Dios lu yōdzō na', ate' lēasca' Bōnni' náquiē' Bō'cu' Zxíla'do' náquiē' le uzení' ni'.

²⁴ Bōnachi yugu' yōdzō, nupa nulágaca, ila'dá lu bení' que yōdzō na', ate' yugu' bōnni' ta'nná bē'ē yōdzōlió idiguá'agaquiē' yōl-la' tsahui' quégaquiē' lu yōdzō na'.

²⁵ Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla.

²⁶ Bōnachi yugu' yōdzō idiguá'agaquiē' ni' le nácagaca lesaca', en yōl-la' tsahui' quéguequi.

²⁷ Tu le ruá' dö' biti' ca' tsaza ni', en calëga tu le naca xihui', en calëga nu rizi' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22

¹ Ní'irö gubáz lá'ayi na' bulu'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiöjjara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'.

² Rizá' yegu ni gatsaj láchui'lö nöza lo que yödzö na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bönachi yugu' yödzö.

³ Biti' soa ni' nitú le dxía dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'.

⁴ Ila'lé'enë' lahuë' Lë', ate' le nazí'i Lë' nazúaj ra' xigágaquië'.

⁵ Biti' gaca rëla ni', ate' nupa nacué' ni' biti' ila'quína tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacué' ni' ila'nná bë'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': “Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz

lá'ayi queë' para uluí'inë' yugu' huen dxin queë' le ral-la' gácatë.

⁷ Caní rnnë' Jesucristo: ¡Chizóa huöda'! ¡Bica' ba nu run ca rna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön.

⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rna le nazúaj lu guichi ni. ¡Ben zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni.

¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

¹² Rnnë' Jesús: "¡Chizóa huöda'! Nu'a lu na'a le nadéli'gaca bönachi, ate' ubi'a que queë'guequi tsca naca le gulúngaca.

¹³ Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'!"

¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en

nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'zi' ye' íla'cuá' ní'ílo ra' yödzo na'.

¹⁶ Neda', Jesús, gusöl-la'a gubáz lá'ayi quia', ate' buluí'ine' libí'ili' yugu' læ ni, libí'ili' na' dzágali' yugu' cö' bönachi quia'. Neda' naca' dí'a dza queë' David, enca' xzí'ini xi'söë'. Naca' ca' bölj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxí' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnníá': Channö nu udá' læ'e didza' ni, Dios ubi'ë que nu na'. Gunë' læ' xíguia' ca naca le nazúajgaca lu guichi ni.

¹⁹ Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzo lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi læ ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxe'ë queëli' yúgu'tëli'. ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25